

19. august 2015

Inatsisartut suleriaasianni § 36 naapertorlugu matumuuna apeqquteqaat aallaavigalugu oqallinnissamik siunnersuut saqqummiuppara:

Sumiiffinni nunami aalajangersimasuni nunaminertanik atuinissamut akuersissuteqarluni takornariartitsisarneq Inatsisartut inatsisaannik nr. 19, 3. december 2012-meersumik tunngaveqartoq pillugu apeqquteqaat aallaavigalugu Inatsisartut oqallinnissaannik siunnersuut.

(Inatsisartunut ilaasortaq – Vivian Motzfeldt Siumut)

Inatsimmi nunatsinni nunaqavissuunissamik piumasagaatit sakkortunerulernissaat pisariaqartutut isigaara, tamatumami qularnaassavaa takornarialerinerup iluani ineriartornermi piginnittuuneq akisussaaqataanerlu Kalaallit akornanniilissammat nunatsinniilerlunilu.

Ullumikkut inatsisip sumiiffinni nunaminertani aalajangersimasuni takornariartitsinermi atuuttup qularnaangilaa atuinissamik piginnaatitaasup nunatsinni nunaqavissuunissaa, tamatumap malitsigaa aningaasarsiutigalugu nunaminertanik atuillutik takornarialerisartut sumiiffinni arlaqalersuni takornariarpassuarnik nunatsinnukartitsisarnerat nunanillu ilaatigut eriaqilluinnagas-saasuni atuisarnerat sunnguamilluunniit nunatta aningaasatigut iluaqutiginnngisaanik.

Nunatta sumiiffiisa ilaanni suliffeqarfiit allamiunit pigineqartut nunaminertani aalajangersimasuni takornariartitsinermut atuillutik misigisassarsiortitsisarnerat annertuumik qaffakkiartorpoq. Nunaminertanik atuinissami nunatta aningaasatigut pissarsissuteqarnissaanik ersarissumik qularnaari-sumillu peqannginnitta, suliffeqarfiillu atuinissamik qinnuteqartut nunatsinnit aallaaveqartariaqarnerat pingaarutilerujussuuvoq nunarput akeqanngitsumik allanit aningaasarsiorfigineqarsinnaanera piumasagaatitaqanngitsumik takannaarutaavoq. Takornariaq takornariartitsivik allamiunit pigineqartoq aqqutigalugu misigisaqarnissaminik pisiaqarsimasoq nunatsinniissinnaavoq ullorpassuit, nunaqqatiminik takornariartitsisulerluni, nunaminertamut atukkaminut akiliuteqarani, akunnittarfinni unnuisarfiusuni atuinani, imaatigut angallanneqarluni nunaqavissut peqataaffiginngisaannik ilami allaat nunatsinniit nerisassanik pisisariaqarani.

Kalaallit nunaqavissut amerlanerusut akuersissutinut peqataatinneqarnerisa qularnaassavaa, najugaqartut piginnittutut misigilersinneqarnissaat. Sumiiffinni ataasiakkaani nunaqavissut akuersissutini suleqataasinneqartariaqarput, piginnittuusussaanerulli mattutissanngilaa allamiunik piginneqateqarsinnaaneq, taamaaliornerullu qularnaassavaa ilisimasanik paarlaasseqatigiinnerup iluani ineriartuaarneq. Inatsimmi suliffeqarfiup minnerpaamik affaa sinnilaarlugu nunaqavissunit pigineqartussaataalernerisa qularnaarnaassavaa takornarialerinerup iluani ineriartornermi piginnittuuneq akisussaaqataanerlu. Taamatuttaaq akuersissutit najukkanut iluaqutaanissaat

qularnaarneqassaaq, sumiiffinnilu najugaqavissut takornialerinerup iluani siumungaaq pilersaarusiorsinnaanerat patajaatsumik ammaanqassalluni.

Apeqquteqaat aallaavigalugu oqallinnermit Inatsisartut oqaaseqaatissaattut siunnersuut imaattoq saqqummiuppara:

“Inatsisartut Naalakkersuisunut kaammattuutigaat, nunatsinni takornariartitsisarnermi nunatsinni najugaqavissut peqataanerullutik suleqataanerulernissaat aqutissiuuteqqullugu, taamaaliornikkut Nunaqavissut takornialerininikkut aningaasarsiornerunissaat anguneqarsinnaassammat.”